


"Gyzah" cu expo "Mystique"

Exposicion diferente di pintura den BNA



ORANJESTAD(AAN)--- Den Biblioteca Nacional Aruba (BNA) lo tin e siman venidero otro exposicion cu duracion di 3 siman, y e biaha aki ta trata di e exposicion individual "Mystique" di e artista local "Gyzah".

No mucho tempopasa, Gyzah a introduci su mes cu e exposicion "Enigma" cu pintura riba sede, y e biaha aki el a prepara un coleccion nobo di pintura acrilico riba lona.

Gyzah ta number artistico di

Gwendy Sneek, kende a nace na Aruba y ta forma parti di e "clan" Sneek.

Famia Sneek ta un famia hopi creativo riba varios tereno, entre otro musica, canto, literatura, diseño grafico etc. Ademá di pinta, Gyzah ta skirbi tamb y ta ofrece fragmento di un poema di su man cu ta forma parti di un di e obranan presenta.

"Mystique" ta resultado di estudio y experiencia di e artista local, basa riba varios disciplina cu el a haci den transcurso di su bida, por ehemplo cura natural cu energia, energia di piedra precioso y aplicacion di esaki na diferente manera, aromaterapia, alfa brainwave control, etc. y tambe su actitud critico semper cu un "mente habri" pa bida y tur locual esaki ta encera.

Di acuerdo cu e autor Ken Eagle Feather (Traveling with power): "E experiencia mistico, contrario na esun oculto, ta un experiencia mas completo posibel cu a hiba na comprendimento di nos mes como parti di lo Divino. E ta kibra barera y ta hací cu nos ta sigui expande y crece continuamente, trascendiendo tempo y espacio."

Gyzah ta duna nos un impresin di e experiencia mistico den su obranan.

Expo "Mystique" ta habri pa publico for di diarazon awor dia 7 di juni te cu dia 23 di juni den Biblioteca Nacional Aruba, George Madurostraat 13.

Ora cu e exposicion ta habri pa publico ta di 10 or mainta riba dialuna, diarazon y diabierna te 7.30 or anochi y riba diamars y diahuebs e exposicion lo ta habri for di 10 or mainta pa 4.30 or atardi. Esnan cu ta desea mas informacion por yama 582-1580 BNA.